

आकाशवाणी जयपुर-अजमेर
प्रादेशिक समाचार ।

दिनांक 24.04.2024

समय: 18.45 बजे

- प्रदेश मांय लोकसभा चुनाव रा दूजा दौर रा तहत 13 सीटां माथे चुनाव प्रचार रो काम पूरो व्हयो-प्रचार रा आखिरी दिन भाजपा, कांग्रेस अर दूजी पार्टियां रा अर निर्दलीय उम्मीदवार प्रचार सारू पूरो जोर लगायो ।
- चुनाव रा दूजा दौर मांय शांति अर कानून व्यवस्था बणायी राखण सारू पुलिस रा 85 हजार ऊं बत्ता अहलकार अर जवान तैनात करी ज्या ।
- राष्ट्रपति द्रौपदी मुर्मू आब-ओ-हवा मांय बदलाव ने गंभीर मुद्दो बतायो- इण रा असर रो सामो करण सारू जंगलात हलका ने बचावण माथे जोर दीनो ।
- प्रदेश मांय घणखर ठौड़ां दिन री बगत जोरदार तावड़ा अर उन्ना बायरा रे कारण गर्मी बधी ।

000

प्रदेश मांय लोकसभा चुनाव रा दूजा दौर रा तैत 13 सीटां माथे व्हेवण वाळा चुनाव सारू प्रचार रो काम आज सिंज्यां 06:00 बज्यां पूरो व्हे ग्यो । अब उम्मीदवार घर-घर जा र जनसंपर्क कर रह्या है । चुनाव रा दूजा दौर मांय टोंक-सवाईमाधोपुर, अजमेर, पाली, जोधपुर, बाड़मेर, जालौर, उदयपुर, बांसवाडा, चित्तौड़गढ़, राजसमंद, भीलवाड़ा, कोटा अर झालावाड़-बारां संसदीय हलकां मांय 26 अप्रैल ने वोट पड़ेला । आं सीटां माथे चुनाव करावण सारू काल संवारे ऊं पोलिंग पार्टियां मतदान केंद्रां ओड़ी रवाना व्हे जावेला । लोकसभा चुनाव रा दूजा दौर रा तैत चुनाव वाळा हलकां मांय प्रचार रा आखिरी दिन आज भाजपा, कांग्रेस, बहुजन समाज पार्टी अर दूजी पार्टियां रा अर निर्दलीय उम्मीदवार जनसभावां अर रोड़-शो कर र जनता ने आप-आप रा पक्ष मांय करण सारू पूरो जोर लगायो । भाजपा रा नेता अर मुख्यमंत्री भजनलाल शर्मा प्रतापगढ़ रा धमोतर अर केकड़ी रा सरवाड़ मांय जनसभावां ने सम्बोधित कीनी । मुख्यमंत्री भीलवाड़ा मांय भाजपा रा कार्यकर्तावां रा सम्मेलन ने ई संबोधित कीना । फिल्म

अभिनेत्री कंगना रानौत आज जैसलमेर मांय भाजपा रा उम्मीदवार री हिमायत मांय रोड़ शो कीनो। उप-मुख्यमंत्री दिया कुमारी आज भीलवाड़ा अर सवाईमाधोपुर मांय पार्टी रा उम्मीदवारां री हिमायत मांय रोड़ शो कीनो। भाजपा रा केई दूजा नेता ई चुनाव प्रचार कीनो।

राज्य रा पैली वाळा मुख्यमंत्री अर कांग्रेस रा नेता अशोक गहलोट आज जालौर, सिरोही अर जोधपुर मांय पार्टी रा उम्मीदवारां री हिमायत मांय रोड़-शो कीनो। कांग्रेस रा प्रदेश अध्यक्ष गोविंद सिंह डोटासरा आज डूंगरपुर रा चौरासी, जोधपुर रा लूणी अर बाड़मेर मांय रोड़ शो कीना अर जनसभावां ने सम्बोधित कीनी। राज्य रा पैली वाळा उप-मुख्यमंत्री अर कांग्रेस रा आला नेता सचिन पायलट टोंक मांय पार्टी रा कार्यकर्तावां रा सम्मेलन ने संबोधित कीनो। वे कोटा लोकसभा हलका ऊं पार्टी रा उम्मीदवार री हिमायत मांय बूंदी मांय चुनावी नुक्कड़ सभा ने संबोधित कीनी। केई दूजी पार्टियां रा नेता अर उम्मीदवार ई वां रा पक्ष मांय वोट देवण री अपील कीनी।

000

प्रदेश मांय लोकसभा चुणाव रा दूजा दौर रा तैत 13 सीटां माथे व्हेवण वाळा चुणाव रे दौरान शांति अर कानून-व्यवस्था बणायी राखण सारू राजस्थान पुलिस सागे केन्द्रीय सशस्त्र बलां री कंपनियां अर होमगार्ड्स रा जवान तैनात करी ज्या है। पुलिस महानिदेशक उत्कल रंजन साहू बतायो के चुणाव मांय राजस्थान पुलिस रा करीब 85 हजार अहलकारां अर जवानां सागे केन्द्रीय सशस्त्र बल अर विशेष सशस्त्र बल री 175 कम्पनियाँ, राजस्थान शहरी-ग्रामीण होमगार्ड रा 18 हजार 400 अर बोर्डर होमगार्ड रा 1 हजार 600 जवान तैनात करी ज्या है। वे बतायो के दूजा दौर रा चुनाव वाळा हलकां मांय 24 पुलिस जिलां रा तहत 28 हजार 105 मतदान केन्द्र अर 651 सहायक मतदान केन्द्र बणायी ज्या है। पुलिस महानिदेशक सगळा मतदातावां ऊं बिना दबाव या लोभ रे निडर व्हे र जिम्मेदार नागरिक रा तौर ऊं लोकतंत्र रा पर्व मांय पूरी सजगता सागे सिरकत करण री अपील कीनी। लोकसभा चुनाव शांति सागे पूरा करावण सारू सगळा जिलां मांय पुलिस अर प्रशासन मुस्तैदी ऊं काम कर रह्या है। आज शाहपुरा मांय सहायक निर्वाचन अधिकारी निरमा विश्नोई अर डीएसपी रमेश चंद्र तिवाडी री अगुवाई मांय फ्लैग मार्च निकाल र बिना डर्यां वोट देवण री अपील करीजी।

डीएसपी बतायो के हलका मांय गैर कानूनी कामां माथे रोक लगावण सारू नाकां माथे हर एक जणा अर गाडी री निगराणी राख्खी जा रही है।

0000

प्रदेश मांय दूजा दौरा लोकसभा चुणाव सारू मतदाता जागरूकता अभियान रा तहत आज ई न्यारा-न्यारा कार्यक्रम राख्खी ज्या। बाड़मेर मांय मानव श्रृंखला बणा र वोट देवण रो संदेश दियो ज्यो अर मतदान केंद्रां माथे वोट देवण सारू आवण वाळां बाबत् मुहैया कराया जावण वाळा सुबीतां रा बारा मांय जाणकारी दीरीजी। झालावाड़ रा झालरापाटन मांय नगरपालिका री ओर ऊं जनता ऊं बत्ता ऊं बत्ता मतदान सारू अपील करी ज्यी। सवाईमाधोपुर रा जिला निर्वाचन अधिकारी डॉक्टर खुशाल यादव री सदरत मांय आज करोबारियां सागे मीटिंग राख्खी ज्यी। मीटिंग मांय 30 ऊं बत्ता कारोबारी उंगली माथे वोट देवण री निशाणी बतावण परां ग्राहकां ने सामान री खरीदी माथे छूट देवण रो ऐलाण कीनो।

जोधपुर रा शहर क्षेत्र— सरदारपुरा, जोधपुर अर सूरसागर मांय सुगम्य पोर्टल रे जरिये वोट देवण रा दिन पात्र मतदातावां ने मतदान केन्द्र माथे लेण मांय लाग्योड़ा लोगां री सही तादाद री जाणकारी दी जावेला। ई सारू वोट देवण वाळां ने विधानसभा हलका अर मतदान केन्द्र री जाणकारी भरणी व्हेला। बारां मांय बत्ता ऊं बत्ता मतदातावां ने मतदान केन्द्र तांई जावण सारू तैयार करण बाबत् गांवां मांय वोट योद्धा लगायी ज्या है। वठे 10-10 सदस्यां री हेला टोलियां ई बणायी ज्यी है, जो संवारे ऊं ई वोट देवण सारू बुलावो करेला। पाली रा सूरजपोल चौराहा माथे आवण-जावण वाळां ने गुलाब रा फूल दे र वोट देवण री मनुहार करी ज्यी।

000

प्रदेश मांय लोकसभा चुनाव रा दूजा दौर वाळा हलकां रा जिला निर्वाचन अधिकारी पात्र मतदातावां ऊं वोट देवण री अपील कर रह्या है। डूंगरपुर रा जिला निर्वाचन अधिकारी अंकित कुमार सिंह वां रा संदेश मांय मतदातावां ने 26 अप्रैल ने वोट जरूर देवण री अरज कीनी।

जैसलमेर रा एस.पी. सुधीर चौधरी ई मतदातावां ऊं बिना ड्रयां वोट देवण री अपील कीनी। वे कहयो के मतदान केन्द्रां माथे हिफाजत रा माकूल इंतजामात करी ज्या है।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है उदयपुर जिला रा डॉ. किशोर कुमार पाहुजा रो संदेश-

राष्ट्रपति द्रौपदी मुर्मू आब-ओ-हवा मांय बदलाव रा मुद्दा ने गंभीर बताता थकां जंगलात हलका री हिफाजत माथे खास जोर दीनो है।

वे आज देहरादून रा वन अनुसंधान संस्थान मांय भारतीय वन सेवा री सिखावण लेवण वाळां अहलकारां रा दीक्षांत समारोह मांय बोल रही ही। राष्ट्रपति कह्यो के इन्सान जान-बूझ र जंगलात हलका रा महत्त्व ने भूलण री गलती कर रही है। वे कह्यो के इन्सान धरती रा अनमोल साधनां रो मालिक नी है बल्कि वां री सार-संभाळ करण वाळो है।

दीक्षांत समारोह मांय 2022-24 कोर्स रा 99 परिवीक्षाधीन अहलकार सिरकत कीनी, ज्यां मांय भूटान रा दो प्रशिक्षु अहलकार ई शामिल हा।

000

प्रदेश मांय घणखर ठौड़ां दिन री बगत जोरदार तावड़ा अर उन्ना बायरा रे कारण गर्मी बधबा लागी है। लारला 24 घंटा मांय केई ठौड़ां पारो ओजू 40 डिग्री सेल्सियस ने पार कर ग्यो। बाड़मेर मांय सब ऊं बत्तो 40 दशमलव 7 डिग्री सेल्सियस तापमान दर्ज करी ज्यो। राज्य रा आतूणी हलका मांय घणखर ठौड़ां पारो 39 डिग्री सेल्सियस ऊं बत्तो दर्ज करी ज्यो। चूरु मांय तेज गर्मी रे कारण दोपहरां री बगत बाजार सूना निजर आया। मौसम विभाग काल भरतपुर अर जयपुर संभाग मांय कठे-कठे हल्की बिरखा रा आसार जताया है। शुक्रवार ने कोटा, उदयपुर, भरतपुर, जोधपुर अर बीकानेर संभाग मांय कठे-कठे हल्की बिरखा री संभावना है।

000

